



আন্দোলনরত প্রাথমিক শিক্ষকদের আশ্বস্ত করলেন সচিব

প্রকাশিত: ২০ - নভেম্বর, ২০১৯ ১২:০০ এ. এম.

স্টাফ রিপোর্টার ॥ বেতন বৈষম্য নিরসনে আন্দোলনরত সরকারী প্রাথমিক শিক্ষকদের আশ্বস্ত করেছেন অর্থ এবং প্রাথমিক ও গণশিক্ষা মন্ত্রণালয়ের সচিব। অর্থ মন্ত্রণালয়ের ঘোষণা প্রত্যাখ্যান করে শিক্ষকদের আন্দোলনের মধ্যে মঙ্গলবার এক বৈঠকে ১৩তম গ্রেডে শিক্ষকদের বেতন যাতে না কমে সে ব্যবস্থা নেওয়ার আশ্বাস দিয়েছেন অর্থ সচিব আব্দুর রউফ তালুকদার। এছাড়া ধাপে ধাপে বাকি দাবিগুলোও পূরণ করা হবে বলে আশ্বাস দিয়েছেন তিনি। অর্থ মন্ত্রণালয়ের সঙ্গে যোগাযোগ করে বেতন বৈষম্য নিরসন করবেন বলে জানিয়েছেন প্রাথমিক ও গণশিক্ষা মন্ত্রণালয়ের সচিব মো. আকরাম আল হোসেন।

মঙ্গলবার প্রাথমিক শিক্ষকদের সঙ্গে পৃথক পৃথক বৈঠকে এ আশ্বাস দিয়েছেন অর্থ এবং প্রাথমিক ও গণশিক্ষা মন্ত্রণালয়ের সচিব। এর আগে সরকারী প্রাথমিক বিদ্যালয়ের সহকারী শিক্ষকদের বেতন ১৩তম গ্রেডে উন্নীতকরণের প্রস্তাব এবং অর্থ মন্ত্রণালয়ের সম্মতিপত্র প্রত্যাখ্যানের ঘোষণা দেন প্রাথমিক শিক্ষক নেতারা। ওই প্রস্তাব বাদ দিয়ে সহকারী শিক্ষকদের বেতন ১১তম গ্রেডে নির্ধারণ করার দাবি জানিয়েছেন তারা। শিক্ষকরা বলেছেন, সহকারী শিক্ষকদের ১১তম গ্রেডে বেতন নির্ধারণের দাবিতে দীর্ঘ পাঁচ বছর প্রাথমিক শিক্ষকরা কর্মসূচী পালন করে আসছে। সহকারী শিক্ষকদের ১২তম গ্রেডে বেতন উন্নীতকরণের প্রস্তাব অর্থ মন্ত্রণালয় পাঠানোর উদ্যোগ কাম্য নয়। প্রাথমিক সহকারী শিক্ষক মহাজোটের সভাপতি শাহীনের আকতার জানান, ১৩তম গ্রেডে সকল শিক্ষকের বেতন কমে যাবে এমন কি ১২তম গ্রেডেও সহকারী শিক্ষকদের ১টি টাকাও বাড়বে না। তাছাড়া প্রধান শিক্ষকদের ১০ম গ্রেডের রায় কার্যকর হলে ১১তম এবং ১০ গ্রেডে টাকার অঙ্কে বৈষম্য হবে সাড়ে তিন হাজার টাকা। গ্রেডে বৈষম্য দূর হলেও টাকার অঙ্কে এই বৈষম্য থেকেই যাবে। সুতরাং বেতনবৈষম্য নিরসনে ১১তম গ্রেডের কোন বিকল্প নেই।

এমন অবস্থায় মঙ্গলবার দুপুরে অর্থ মন্ত্রণালয়ের সচিব আব্দুর রউফ তালুকদারের সঙ্গে বৈঠক করেছেন বাংলাদেশ প্রাথমিক শিক্ষক ঐক্য পরিষদের নেতারা। এ সময় ১৩তম গ্রেডে প্রাথমিক শিক্ষকদের বেতন যাতে না কমে সেই ব্যবস্থা নেয়ার আশ্বাস দিয়েছেন অর্থ সচিব। শুধু তাই নয়, ধাপে ধাপে প্রাথমিক শিক্ষকদের বাকি দাবিগুলোও পূরণ করা হবে বলে আশ্বাস দেন তিনি।

বৈঠকে বাংলাদেশ প্রাথমিক শিক্ষক ঐক্য পরিষদের আহ্বায়ক মোঃ আনিসুর রহমান, সদস্য সচিব মোহাম্মদ শামসুদ্দীন মাসুদ, প্রধান মুখপাত্র মোঃ বদরুল আলম, প্রধান উপদেষ্টা আনোয়ারুল ইসলাম তোতা, মুখপাত্র এনএ সিদ্দিকি রবিউল, প্রধান সমন্বয়ক আতিকুল ইসলাম, সদস্য বেগম বাঁধন খান ববি উপস্থিত ছিলেন।

এ সময় তারা অর্থ সচিবের কাছে শিক্ষকদের বিভিন্ন সমস্যা ও ১৩তম গ্রেডে প্রাথমিক শিক্ষকদের বেতন কমে যাওয়ার বিষয়টি উপস্থাপন করেন। পরে অর্থ সচিব তাদের দাবি মেনে নেন এবং ১৩তম গ্রেড রেখেই শিক্ষকদের বেতন বাড়ানোর ব্যবস্থা করা হবে বলে আশ্বাস দেন। এছাড়াও পর্যায়ক্রমে বাকি দাবিগুলো মেনে নেওয়া হবে বলেও আশ্বাস দিয়েছেন তিনি।

অর্থ সচিবের এমন আশ্বাসের পর বাংলাদেশ প্রাথমিক শিক্ষক ঐক্য পরিষদের নেতারা প্রাথমিক ও গণশিক্ষা সচিব মোঃ আকরাম আল হোসেনের সঙ্গে বৈঠক করেন এবং অর্থ সচিবের সঙ্গে বৈঠকের বিষয়টি তাকে অবগত করেন। এ সময় প্রাথমিক ও গণশিক্ষা সচিব মোঃ আকরাম আল হোসেন শিক্ষকদের দাবিগুলো সহজে বাস্তবায়নের জন্য ৫ সদস্যের একটি কমিটি গঠন করা হবে বলেও আশ্বাস দেন।

অর্থ সচিবের এমন আশ্বাসের পর শিক্ষকদের দাবিগুলো সহজে বাস্তবায়নের জন্য ৫ সদস্যের একটি কমিটি গঠন করে দেয়ার আশ্বাস দিয়েছেন প্রাথমিক ও গণশিক্ষা মন্ত্রণালয়ের সচিব।

20/11/2019

আন্দোলনরত প্রাথমিক শিক্ষকদের আশ্বস্ত করলেন সচিব » অন্য খবর » DAILYJANAKANTHA.COM

এ রাশেদ খান মেনন সড়ক, নিউ ইস্কাটন, জিপিও বাস: ৩৩৮০, ঢাকা, ফোন: ৯৩৪৭৭৮০-৯৯ (অটোহাণ্ডিং ২০ টি লাইন), ফ্যাক্স: ৯৩৫১৩১৭, ৮৩১৬৩৩৫, ই-মেইল: janakanthanews@gmail.com ওয়েবসাইট: www.dailyjanakantha.com এবং www.edailyjanakantha.com || Copyright © All

rights reserved by dailyjanakantha.com

